

經世上疏辭職

許之

○以鄭光績為大司憲鄭經世為副提學○庚辰兩夜

四方有氣如火○上晝講論語于資政殿同知事鄭曄曰朋黨之禍已垂五十年分離乖隔日以益甚已丑逆變起於縉紳之間故當時治獄或未免過中而事過之後傾軋尤甚至以崔永慶之死為鄭澈之罪案至今藉口永慶再鞫之舉具成率易發論李海壽以大司諫連啓數日即蒙允許故其後海壽與具成李尚吉李洽等同被罪罰成等已蒙原釋而獨海壽以已死之故尚未伸理其時被罪之人今皆昭雪則海壽亦宜一體復爵請令廟堂參商以處上曰依為之○禮曹判書李廷龜上劄辭判義禁曰臣賦性疎迂不能剛戾徒欲仰體欽恤之至意未免外議之不快臣當受以為罪至於尹仁義緣坐事詳在推緘之中而吳煥事則當初請拿請刑者臣也請刑事干者亦臣也而刑官與臺官有異雖知情狀之可惡必須訊鞫得實然後可以擬律故昨日筵中請嚴鞫事干而辭不達意致令筵臣面斥此無非臣常日歇後使人先疑之致請先適無帶判義禁以便公私答曰刑獄之設固非得已而縲紲之中易致冤枉故歷代願治之君莫不以刑獄為重此豈慢忽之地哉雖曰咎罪不可容易處決况死囚乎刑罰不慎何事可慎卿之不務目前之快實得慎獄之體於卿有何所